



Fotografias da tuttas varts e da tut ils formats vegnan purtadas a a la Fundaziun grischuna per la fotografia.

FOTO FUNDAZIUN GRISCHUNA PER LA FOTOGRAFIA

«Guarda in mument sin las fotos – e tut è cler!»

Dapi il cumenzament appartegna el a la Fundaziun grischuna per la fotografia. Ils proxims dis surdat Bernard Cathomas il presidi da la fundaziun a Corina Casanova. La FMR ha discurren cun Bernard Cathomas.

MARTIN GABRIEL/FMR

FMR: Bernard Cathomas, tge muntada han fotografias veglias per Vos e tgeninas èn Vossas preferidas?

Bernard Cathomas: Fotografias èn part da la memoria visuala dapi passa 150 onns. Pli ch'ins emblida e pli gronda lur muntada. Mias preferidas èn quellas che mussan co la gliued viveva, lavurava, sa divertiva. Per exempel las fotos dad Albert Steiner da l'Engiadina, da pader Karl Hager da sisum la Surselva. Ma er quellas da fotografas main enconuschents èn documents fitg prezius che mintgin chapescha.

Tge bilantscha tirais Vos da Voss temp sco president da la Fundaziun grischuna per la fotografia?

Jau sun president pir dapi che l'emprim president, Marcus Caduff, è en la regenza. Successivmain è la fundaziun sa sviluppada ed è daventada pli visibla.

Oz elavura ella projects innovativs, schizunt ensemen cun la SPF/ETH e la Biblioteca naziunala. La giuvna squadra enturn il maingestiu Pascal Werner persvada. Ed ils gremis da la fundaziun contribueschan cun cumpetenza politica e culturala.

La fundaziun ha il scopo da conservar – quai è in pau en il trend actualmain, sch'ins guarda il moviment dals archivs culturals. In bun trend?

Metter en salv tut fiss in sbagli. Ina societad cun producziun da massa sco la nosssa sto er savair bittar davent per far plaz a novas chausas. Ovras culturalas da valor sco fotografias da qualitat ston dentant vegnir conservadas. Ellas gidan nus a chapir danunder che nus vegnin, tge che ha furnà nus e tgi che nus essan. Quai è impurtant per il bainesser da mintgin e da la cuminanza. Per quest intent restan archivs culturals e fotografics fitg necessaris.

Tge è la «raison d'être» da la Fundaziun grischuna per la fotografia?

La raschun principala è da salvar relaschs fotografics ch'èn en privel da svanir u patir donns entras deposits nunadattads. In segund pensum è da digitalisar e derasar las fotos ed uschia sensibilisar la populaziun per quest bain cultural. E la finala vuless la fundaziun daventar in center da cumpetenza per la fotografia. Suenten set onns d'existenza resta anc blier da far per realisar questas finamiras. Persuenten duvrassi er dapli finanzas.

L'emprim mument sin la pagina d'internet ston ins guardar bain areguard la structura

da la fundaziun. I para che l'adressa dad internet è quella d'ina uniun affiliada. Lura datti anc in'otra uniun affiliada e sur quellas duas stat la fundaziun. Para in construct cumplitgà?

Para cumplitgà, ma è simpel. I na dat naginas uniuns affiliadas. La fundaziun sa basa sin in grond stgazi fotografic da l' anteriura uniun Cronica, e Pascal Werner ha realisà en la fundaziun sia idea dad ina mediateca grischuna. Ils differents numms mussan la genesa da la fundaziun. Quella metta paisa sin la collavuraziun cun ils posts da cultura chantunals, cun museums regional ed archivs communal.

Suenten Voss presidi surpiglia Corina Casanova il timun. Tge cussegls dessas Vos sin via ad ella?

Corina è ina presidenta versada e cumprova da en bleras instituziuns. Cun Barbara Jannom Steiner, Chasper Pult, Madleina Deplazes da la Fundaziun svizra per la fotografias e cun las ulteriuras persunas dal fatg en noss gremis sco er cun il gestiunari Pascal Werner, ha ella ils megliers cussegliaders a sia disposiziun. Mes cussegl en cas ch'ella sa dumandass ina giada, sche la lavur fetschia senn: guarda in mument las fotos sin www.fotoGR.ch – e tut è cler!

La Fundaziun grischuna per la fotografia

La Fundaziun grischuna per la fotografia è vegnida iniziada l'onn 2013 d'Erwin Bundi, l'antierur schef da l'Uffizi chantunal da planisaziun dal Grischun. Ses scopo è stà da conservar e da metter a disposiziun fotografias or da collecziuns e relaschs da l'entir Grischun e da daventar in center da cumpetenza per la fotografia. Aifer ils davos set onns è la fundaziun prosperada ed è oz in partenari impurtant per bliers interessents ed utilisaders da fotografias. En collavuraziun cun il maun public e cun instituziuns e persunas privatas vul la Fundaziun grischuna per la fotografia elavurar scientificamain la varietad fotografica dal Grischun. Pli navant vul ins porscher occurenzas da furmaziun e perscrutaziun en collavuraziun cun la branscha e cun possessurs da collecziuns fotograficas. La fundaziun ha in cussegl cun sis persunas, in cussegl consultativ cun trais commembers sco er in post da gestiun. Ultra da quai èn er las duas uniuns affiliadas Cronica e

Mediateca grischuna acturs impurtants da la fundaziun. A las numerusas collecziuns en la rait da la Fundaziun grischuna per la fotografia appartegnan per exempel l'archiv da maletgs



Il post da fatschenta da la Fundaziun grischuna per la fotografia a Cuira. FOTO MAD

da la Stussavgia, fotografias da la Surselva, il relasch dal fotograf Jules Geiger da Flem, ubain er la versiun digitalisada per l'internet da la collecziun da l'Archiv culturel Engiadina'Ota. Per amur da la chausa realisescha la fundaziun er collavuraziuns sin mesira cun autras instituziuns. Ils custs da digitalisar, describer e conservar sa distinguan fitg dad ina foto u ina collecziun a l'otra. Per in grond relasch sco quel da Christian Caduff da Castrisch cun fotos da l'entir Grischun ord plirs decennis lavura in civi durant mais, senza quintar la lavur dals experts per dumondas specialas. La fundaziun ha il mument mo var 200 000 francs a disposiziun per tut sias incumbensa. Per far lavur entira duvrassi dapli meds. Ina da las incumbensas dal cussegl da fundaziun è perquai er il recaltgar finanzas. Qua spetga la fundaziun er dal chantun in augment da sia contribuziun annuala da fin uss, cunquai che la lavur da la fundaziun succeda a favur da l'entir chantun. (fmr/mg)